

Iwwer die Gaddeveeschel

Omm nächsde Wocheend kann merr widder e Stunn long die Gaddeveeschel beobachten und zähle unn kann dess Ergebnis dem NABU dorschgewwe. Mir hawwe im Gadde e Fudderheisje unn e Schal voll mett Wasser, unn omm Heisje unn omm Wasser kann merr die Veeschel omm bessde seh unn kann erkenne unn bestimme, was ferrn Voochel sisch dort uffhalle dut.

Isch waaß nitt wies wo onnersders iss in Flerschem, awwer bei uns im Gadde duts immer mieh gruße Veeschel gewwe. Unn vill vunn dene sinn Raweveeschel, obwohl merr dess nitt immer su seh kann, weil se nitt all schwarz sinn.

Omm meisde im Gadde dun merr die Rawe seh. Ja, merr kann ruhisch Rawe saache, weil ess sinn Rawekrähe, dess sinn die Sort Krähe, die e kloo bissi greeßer sinn als wie die Saatkrähe, awwer dess sieht merr nitt uff de ersde Blick. Alloons omm Schnawwel kann merr se erkenne, weil die Saatkräh enn graue Schnawwel hott und die Rawekrah enn schwarze. Also im Gadde habb isch noch nie e Saatkräh gesehe, weil die sinn gesellig und fliehe unn niste im Trupp, während die Rawekrah liewer alloons iss unn aach ferr ihr Nest koo Kolonie brauche dut.

Aach enn Eichelhäher mächt immer mol in de Beem erum unn schennt, wenn merr uff de Terrass sitze, dess konner nitt leide. Der iss aach enn Rawevoochel, was merr nitt gleisch sehe dut, weiler Farb im Gefieder hott. Unn aach die Atzele mett ihrne schillernde Feddern geheern zu de Rawe.

Obwohl all die Raweveeschel Allesfresser sinn unn aach Voocheleier unn junge Veeschel aus de Nester holle unn merr se dessdeweese villeischd außem Gadde jaache sollt, sinns joo scheene Veeschel. Unn schlaun sinns aach.

Dess hawwe merr geseh, weil merr ferr die Meisjer su enn Meiseknödel onnere Kordel unnerm Fudderheisje uffgehängd unn gedenkd hadde, doo kenne nor die Meise als Kledderveeschel droo. Awwer uff oomol iss enn Raab kumme, setzt sisch uffs Heisje, nimmt die Kordel in de Schnawwel unn zieht meddem Schnawwel unn mett oom Fuß die Kordel hoch, bisser de Knödel greife unn fuddern konnt. Unn bei die Wasserschal kimmt ab unn zu enn Rab, der irschendwo e Schdigg Trockebrot gefunne hott unn dess dort dunke dut, weilers donn besser fresse kann.

Awwer aach enn Grünspecht, zu dem merr frieher Erdspecht gesaad hott, kimmt monschmol in de Gadde unn dut im Gras nooch Ameise suche.

Doch jetzt bei die kloone Veeschel. Ess sinn Grünfinke unn aach Spatze, die beis Fudderheisje kumme, meisdens sinns awwer Kohlmeise. Die Meisjer kenne joo nitt long uff oom Platz bleiwe, allsfort sinns in Beweeschung, fliehn in die Beem unn klettern in de Zweische erum, nor enn Aacheblig, donn fliehn se wo onnersders hie unn aach ins Heisje, unruhische Geister sinn dess.

Nor schad, weil im Gadde hawwe merr zwaa Nistkäsde hänge unn dissjohr hawwe sisch in dene noch koo Mieter oigestelltd, villeischd kumme se noch.

Eiern Honnes